

現代生活藝術系列

華嚴經疏論纂要

116

— 入法界品 之十九

華藏淨宗學會印贈

大方廣佛華嚴經疏論纂要卷第一百之十六

五臺山清涼國師澄觀疏鈔

太原方山長者李通玄 論

聞鼓山私淑比丘道需纂要

入法界品第三十九 之十九

○自下大文第四明智照無二相顯前因法生果
 體無分別絕境智等諸二相故又善財障盡惑
 除未始動念是故反照唯是初心更無異也卽
 信智無二鈔第四智照無二相絕境智等諸二
 相者謂一境智無二二始末無二亦
 信智無二二染淨無二四智斷無二五理事無
 二由證理事無二義故染淨無二惑性智性一

性平等。始末無差。能所齊融。亦不生二。不二分別。故前經云。心不稱量。諸二法。但恆了達。法無二。諸法若二。若不二於中。罪文但有三。第一。究竟無所著。方爲真不二矣。

教趣求。第二。見聞證入。第三。轉遇勝緣。今初。

爾時善財童子。依彌勒菩薩摩訶薩教。漸次而行。經由一百一十餘城已。到普門國蘇摩那城。住其門所。思惟文殊師利。隨順觀察。周旋求覓。希欲奉覲。

疏言經游百一十餘城已者。百一十義已見上文。然此游城。復有二義。一。但從彌勒至於文殊。自經百一十城。非連取前。二者加前百一十友。故云餘城。卽通取前友。普收諸法。歸一照故。若爾。前友此

城。豈得同耶。亦有二義。一者友必依城。則一城一友。二者或於一城。值於多友。或求一友。歷於多城。而要具一百一十。以順表法故。鈔或於一城者。如言或求一友。歷於多城者。如解脫處。經十二年。求於普眼。經歷多城等。此義勝前。到蘇摩那者。此云悅意。卽華名也。謂智照一性。悅本心故。卽德生城。有本云。至普門國。顯攝諸差別。歸無二相。卽普門故。言住其門所者。顯解心已極。將入般若。若無二之門故。

○第二見聞證入

是時文殊師利。遙申右手。過一百一十由旬。按善財

頂

〔疏〕此下卽是所漏脫文。義如前說。然以極照無二。心境兩亡。故畧無敬問。信解雙絕。故不見現身。而反照未移信心。故申右手。又不見乃爲真見。但了自心空般若故。文中三一。摩頂攝受。過百一十由旬者。徹過前位故。始信該於極果。故曰遙申。隨順行成。故曰右手。然過城約超封域。由旬明超數量。又前越諸位。斷德。後越諸位。智地。按頂表於攝受。亦以普法置心頂故。信至極故。

作如是言。善哉善哉。善男子。若離信根。心劣憂悔。功

行不具。退失精勤。於一善根心生住著。於少功德便已爲足。不能善巧發諸行願。不爲善知識之所攝護。不爲如來之所憶念。不能了知。如是法性。如是理趣。如是法門。如是所行。如是境界。若周徧知。若種種知。若盡源底。若解了。若趣入。若解說。若分別。若證知。若獲得。皆悉不能。

疏二誨示法門。卽舉失顯得。謂若離信根等。不了法性等。反顯善財有信根等。能了法性等。於中先列所闕行法。文有九句。前七闕因。一闕行本故。二求小故。心劣。處生。死而憂悔。三橫不具。四豎不進。

五滯一善。六不廣求。七不起無任行願。後二闕緣。後不能了。下不能成。益中有十五句。前五約所知。理事。後十約能知分齊。例前諸文思之。又前九中。初一信根。是所闕因。餘皆不能成。益約法。功歸於信。約人前友之法。皆由文殊。

是時文殊師利。宣說此法。示教利喜。令善財童子成就阿僧祇法門。具足無量大智光明。令得菩薩無邊際陀羅尼。無邊際願。無邊際三昧。無邊際神通。無邊際智。令入普賢行道場。及置善財自所住處。文殊師利還攝不現。

疏三結益歸本。於中十句。前九結益甚淡。初一總餘八別。前智光明。卽般若方便。後無邊智。卽智波羅密。普賢行道場者。舉足下足。皆與普賢行相應。故。自所住處者。卽是法界。是文殊大智無住住故。又普行道場。卽法界理。自所住處。卽文殊智。此亦義同。示於後友普賢之境。後一句攝用歸本。所作竟故。信窮智境。信相便亡。故云不現。鈔初一總者。喜。示謂顯。示法門。教謂勸令修行。利謂覺悟成益。喜謂稱根。令悅。經從具足無量。下別句。疏隨難釋。先出初句。異於第六。二三四五。並皆不釋。後釋七八二句。而有二意。一當句釋。屬於二人。二相合釋。文殊能住。普賢道場。是所住故。此亦義同者。以安普賢行道場故。文無正示。故云義同。

○第三轉遇勝緣修行敬事

於是善財思惟觀察。一心願見文殊師利。及見三千大千世界微塵數諸善知識。悉皆親近恭敬承事。受行其教。無有違逆。

〔疏〕然此諸友。及後普賢。皆無指授者。表證法界。離此彼相故。此三千友。乃有多義。一者成前。尙是文殊之益。二者順後。爲入理方便。又通論諸友。更分三分。初文殊一人。爲信心之始。次至後文殊。爲智滿之終。故此總見三千等友。後之普賢。理智無二。又前諸友。一一各逢。卽是純門。此中諸友。一時頓

見。卽顯雜門。後普賢一人。具前諸友。卽純雜無礙。又此諸友所得法門。受行各別。文所不具。結廣從畧。故總云三千耳。

○大文第五顯因廣大相。以前照理無二。顯其甚深。方堪成佛廣大之因。以隨一一因。皆稱法性。故文殊般若。卽攝相歸體。普賢法界。卽秘密重。重。若以二聖相對。則文殊爲能證。若以二聖對善財。則文殊亦爲所證。未得般若。今證得故。鈔文第五顯因廣大相。以隨一一因者。釋廣大義。異前攝德成。因未說一一稱法界故。又前但因。今明因徹果海故。文殊下。對前辨異攝相歸性。事理無礙。秘密重重。事事無礙。若以二聖下。後

一聖相望。二聞覩前相。辨其能所。文中分三。初依教趣求。二聞覩前相。

○三見聞證入。今初

增長趣求一切智慧。廣大悲海。益大慈雲。普觀衆生。生大歡喜。安住菩薩寂靜法門。普緣一切廣大境界。學一切佛廣大功德。入一切佛決定知見。增一切智助道之法。善修一切菩薩深心。知三世佛出興次第。入一切法海。轉一切法輪。生一切世間。入於一切菩薩願海。住一切劫修菩薩行。照明一切如來境界。長養一切菩薩諸根。獲一切智清淨光明。普照十方除諸闇障。智周法界。於一切佛刹。一切諸有。普現其身。

靡不周徧。摧一切障。入無礙法。住於法界平等之地。
觀察普賢解脫境界。

疏有二十六句。初一標求佛果。後一總觀圓因。中間諸句。義通前後。皆是趣佛之因。並是普賢解脫境故。就中間攝爲十對。初四四等普周。寂靜卽捨故。次二福智無外。緣境是智故。次二入正增助。次二修因知果。次三入法現生。次二證願修行。次二照上增下。次二得實照權。次二智周身徧。後三摧障入理。其入無礙法。向上成無二礙。向下卽成無礙法界。其住平等地。卽前文殊自所住處。後總句。

觀普賢境。卽前普賢行道場。以是顯因廣大相故。文殊通指善財普觀。不同前文。一友指於一友。良以普觀。方見普賢故。

○第二聞觀前相於中先聞後觀今初

卽聞普賢菩薩摩訶薩名字。行願助道。正道諸地。地方便。地入地勝。進地住地。修習地境界地。威力地同住。

〔疏〕有十三句。初一聞人名。後十二聞行位。卽聞二字。貫下諸句。此中聞者。非從一人多人聞之。卽稱法界而聞耳。諸地者。普賢位中自行依地。及圓融。

所攝地也。此句總下八別。一地方便者。卽加行也。
二卽入心。三出心。四住心。五卽修施戒等。六卽徧
行真如等爲所證境。亦是所得分齊之境。七卽神
通作用。摧邪攝生等。八卽同依佛智而住。

○二明觀於中。二先仰德修觀。後觀見希奇。今初。
渴仰欲見普賢菩薩。卽於此金剛藏菩提場毗盧遮
那如來師子座前。一切寶蓮華藏座上。起等虛空界
廣大心。捨一切剎離一切著無礙心。普行一切無礙
法無礙心。徧入一切十方海無礙心。普入一切智境
界清淨心。觀道場莊嚴明了心。入一切佛法海廣大

心化一切衆生界周徧心。淨一切國土無量心。住一切劫無盡心。趣如來十力究竟心。

疏初聞前人法。故生渴仰。次卽於下。修觀。菩提場者。是所觀處。金剛藏者。約表。卽於本所信自心佛果菩提體中。金剛智內。起一切因陀羅網普賢心觀。約事。卽前其地金剛。而蘊德具嚴。故名爲藏。然此經體勢。應具十會。以順無盡。又始起覺場。義應歸本故。鈔然此經下。總釋文意。謂所以卻就金剛場起觀者何。於中有一先繫表出意。謂華嚴一切。皆悉具十會。亦應然。合有第十攝末歸本。重會覺場。謂菩提場是根本會。起於中八名爲末會。謂第十會攝前八會。歸於初會。無不從此法界所流。無不還歸此法界故。今且依文。

對前本末二會。卽是攝末歸本之義。是以善財不假別指。便於初會始成之處。如來座前而起觀求。鈔後今且依文者。明其無十故。就第九以明此三。一者本會。二者末會。三自普賢以爲攝末歸本之會。本有二種。逝多乃是此會之本。今歸覺場。是諸會本。後起等下。正顯觀心。有十一句。皆稱普賢境而起於心。故後得見。

○二觀見希奇

善財童子起如是心時。由自善根力。一切如來所加被力。普賢菩薩同善根力故。見十種瑞相。何等爲十。所謂見一切佛刹清淨。一切如來成正等覺。見一切佛刹清淨。無諸惡道。見一切佛刹清淨。衆妙蓮華以

爲嚴飾。見一切佛刹清淨。一切衆生身心清淨。見一切佛刹清淨。種種衆寶之所莊嚴。見一切佛刹清淨。一切衆生諸相嚴身。見一切佛刹清淨。諸莊嚴雲以覆其上。見一切佛刹清淨。一切衆生互起慈心。遮相利益不爲惱害。見一切佛刹清淨。道場莊嚴。見一切佛刹清淨。一切衆生心常念佛。是爲十。又見十種光明相。何等爲十。所謂見一切世界所有微塵。一一塵中。出一切世界微塵數佛光明。網雲周徧照耀。一一塵中。出一切世界微塵數佛光明。輪雲種種色相。周徧法界。一一塵中。出一切世界微塵數佛色像。寶雲

周徧法界。一一塵中。出一切世界微塵數佛光。餽輪
雲。周徧法界。一一塵中。出一切世界微塵數衆妙香
雲。周徧十方。稱讚普賢一切行願大功德海。一一塵
中。出一切世界微塵數日月星宿雲。皆放普賢菩薩
光明徧照法界。一一塵中。出一切世界微塵數一切
衆生身色像雲。放佛光明徧照法界。一一塵中。出
一切世界微塵數一切佛色像摩尼雲。周徧法界。一一
塵中。出一切世界微塵數菩薩身色像雲。充滿法界。
令一切衆生皆得出離所願滿足。一一塵中。出一切
世界微塵數如來身色像雲。說一切佛廣大誓願周

徧法界。是爲十

〔疏〕於中二。先結前生後。兼顯見因。後見十種下。正

觀希奇。於中二。一見瑞相。十句五對。各先所依淨

土。後住處衆生。鈔一見瑞相者。然其十句。皆是淨土。而具後句。意在衆生。如初對云。

見一切佛刹清淨。一切如來成正覺。卽屬淨土。二云。見一切佛刹清淨。無諸惡道。無諸惡道。卽是住

處衆生。五對皆然。二觀光明。前瑞則直見一重淨刹。此明

重見。又前麤此細。前體相。此業用。然皆是普賢依

報之刹。又前粗者。前但云見一切佛刹。今一塵中。出一切世界。故此爲細。言前體相。此業

用者。前但云見。今塵中出故。

○第三見聞證入於中三。初結前生後

時善財童子見此十種光明相已。卽作是念。我今必見普賢菩薩。增益善根。見一切佛。於諸菩薩廣大境界。生決定解。得一切智。

〔疏〕由覩前相。生必見心。

○二起觀增修

於時善財普攝諸根。一心求見普賢菩薩。起大精進。心無退轉。卽以普眼。觀察十方一切諸佛諸菩薩衆。所見境界。皆作得見普賢之想。以智慧眼觀普賢道。其心廣大。猶如虛空。大悲堅固。猶如金剛。願盡未來。常得隨逐普賢菩薩。念念隨順修普賢行。成就智慧。

入如來境。住普賢地。

〔疏〕初攝散住定。次策勤無退。次觀其體徧。以法界爲身故。次悲智橫廣。次願行豎窮。後得果圓。因此乃總攝諸觀。行人欲見。當倣此修。離此觀心。見亦非勝。

○三正明見聞證入。於中二。先正見聞證入。後聞佛德難思。前中亦二。先顯得益圓因。後位滿齊佛。前中分四。一見身得益。二摩頂得益。三顯因深廣。四觀用無涯。初中二。先見勝身。後得深益。前中四。一總見勝德身相。二別見毛孔出生。三

重觀體內包含。四結通周徧。今初。

時善財童子。卽見普賢菩薩。在如來前衆會之中。坐寶蓮華師子之座。諸菩薩衆所共圍繞。最爲殊特。世無與等。智慧境界無量無邊。難測難思。等三世佛一切菩薩無能觀察。

○**疏**由前於菩提場師子座前起勝想故。

○二別見毛孔出生

見普賢身一一毛孔。出一切世界微塵數光明雲。徧法界虛空界一切世界。除滅一切衆生苦患。令諸菩薩生大歡喜。見一一毛孔。出一切佛刹微塵數種種

色香燄雲徧法界。虛空界一切諸佛衆會道場。而以
普熏。見一一毛孔。出一切佛刹微塵數雜華雲。徧法
界。虛空界一切諸佛衆會道場。雨衆妙華。見一一毛
孔。出一切佛刹微塵數香樹雲。徧法界。虛空界一切
諸佛衆會道場。雨衆妙香。見一一毛孔。出一切佛刹
微塵數妙衣雲。徧法界。虛空界一切諸佛衆會道場。
雨衆妙衣。見一一毛孔。出一切佛刹微塵數寶樹雲。
徧法界。虛空界一切諸佛衆會道場。雨摩尼寶。見一
一毛孔。出一切佛刹微塵數色界天身雲。充滿法界。
歎菩提心。見一一毛孔。出一切佛刹微塵數梵天身

雲。勸諸如來轉妙法輪。見一一毛孔。出一切佛刹微塵數。欲界天王身雲。護持一切如來法輪。見一一毛孔。念念中出一切佛刹微塵數。三世佛刹雲。徧法界虛空界。爲諸衆生無歸趣者。爲作歸趣。無覆護者。爲作覆護。無依止者。爲作依止。見一一毛孔。念念中出一切佛刹微塵數。清淨佛刹雲。徧法界虛空界。一切諸佛於中出世。菩薩衆會悉皆充滿。見一一毛孔。念念中出一切佛刹微塵數。不淨佛刹雲。徧法界虛空界。令雜染衆生皆得清淨。見一一毛孔。念念中出一切佛刹微塵數。不淨淨佛刹雲。徧法界虛空界。令

雜染衆生皆得清淨。見一一毛孔。念念中出一切佛刹微塵數不淨佛刹雲。徧法界虛空界。令純染衆生皆得清淨。見一一毛孔。念念中出一切佛刹微塵數衆生身雲。徧法界虛空界。隨其所應教化衆生。皆令發阿耨多羅三藐三菩提心。見一一毛孔。念念中出一切佛刹微塵數菩薩身雲。徧法界虛空界。稱揚種種諸佛名號。令諸衆生增長善根。見一一毛孔。念念中出一切佛刹微塵數菩薩身雲。徧法界虛空界。一切佛刹。宣揚一切諸佛菩薩。從初發意所生善根。見一一毛孔。念念中出一切佛刹微塵數菩薩身雲。徧

法界虛空界。於一切佛刹。一一刹中宣揚一切菩薩願海。及普賢菩薩清淨妙行。見一一毛孔。念念中出普賢菩薩行雲。令一切衆生心得滿足。具足修習一切智道。見一一毛孔。出一切佛刹微塵數正覺身雲。於一切佛刹現成正覺。令諸菩薩增長大法成一切智。

〔疏〕毛孔出生。廣徧法界。實則重重無盡。畧顯二十重。亦對前善財渴仰所起十一心故。其初等虛空廣大等五心。徧此諸句。餘之六心。別生諸句。且除初一句。次之五句。由前觀道場明了心。故出雲等。

皆嚴道場。次歎菩提心下三句。由前入佛法海心。
 次一句。及最初一句。由化衆生界心。次四由前淨
 一切國土心。亦兼化衆生心。後六句。由前任一切
 劫。及趣如來十力究竟心。竝如文思之。是知各由
 自心所見分齊。鈔然毛孔出生等。廣如玄中。今更
 畧示。謂彼普賢游入十方。畧有十
 門。一入世界。法界緣起。互卽入故。二入衆生界。生
 界佛界無二體故。三明供養。一供具皆稱眞故。
 四明請法窮法界智無時不請。諸佛無時不雨法
 故。五大智攝生了生迷倒而無衆生不礙化故。六
 明現通十方塵刹互入重重震動現相而無息故。
 七常寂定未曾一念有起動故。八廣出生念念毛
 孔出現諸境無窮盡故。九者說法念念常雨無邊
 法雨。雨一切故。十明總說上之九義。舉一全收。無
 前後故。廣說難
 盡餘廣如文

○三重觀體內包含

爾時善財童子見普賢菩薩如是自在神通境界。身心徧喜。踊躍無量。重觀普賢一一身分。一一毛孔。悉有三千大千世界。風輪。水輪。地輪。火輪。大海。江河。及諸寶山。須彌鐵圍。村營城邑。宮殿園苑。一切地獄。餓鬼畜生。閻羅王界。天龍八部。人與非人。欲界色界無色界處。日月星宿。風雲雷電。晝夜月時。及以年劫。諸佛出世。菩薩衆會。道場莊嚴。如是等事。悉皆明見。如見此世界。十方所有一切世界。悉如是見。如見現在十方世界。前際後際。一切世界。亦如是見。各各差別。

不相雜亂

〔疏〕於中二。初結前生後。後重觀下。正顯於中亦二。先見三千。後如見此下。類通十方三際。

○四結通周徧

如於此毗盧遮那如來所。示現如是神通之力。於東方蓮華德世界賢首佛所現神通力。亦復如是。如賢首佛所如是。東方一切世界。如東方。南西北方。四維上下。一切世界。諸如來所現神通力。當知悉爾。如十方一切世界如是。十方一切佛刹。一一塵中。皆有法界諸佛衆會。一一佛所普賢菩薩坐寶蓮華師子座。

上現神通力。悉亦如是。彼一一普賢身中皆現三世一切境界。一切佛刹。一切衆生。一切佛出現。一切菩薩衆。及聞一切衆生言音。一切佛言音。一切如來所轉法輪。一切菩薩所成諸行。一切如來遊戲神通。

〔疏〕文有四重舉類。末結塵中普賢。是知前則身中包合法界。廣無邊故。顯其普義。今則全此合法界身。潛入塵中。調柔無礙。明其賢義。內外周徧。限量斯盡。故名普賢。

○二明得深益

善財童子。見普賢菩薩如是無量不可思議大神通。

力。卽得十種智波羅蜜。何等爲十。所謂於念念中。悉能周徧一切佛刹智波羅蜜。於念念中。悉能往詣一切佛所智波羅蜜。於念念中。悉能供養一切如來智波羅蜜。於念念中。普於一切諸如來所聞法受持智波羅蜜。於念念中。思惟一切如來法輪智波羅蜜。於念念中。知一切佛不可思議大神通事智波羅蜜。於念念中。說一句法盡未來際辯才無盡智波羅蜜。於念念中。以深般若觀一切法智波羅蜜。於念念中。入一切法界實相海智波羅蜜。於念念中。知一切衆生心智波羅蜜。於念念中。普賢慧行皆現在前智波羅

蜜

〔疏〕既得智度已彰地滿。况十表無盡耶

一見身得益竟

○第二明摩頂得益

善財童子既得是已。普賢菩薩卽申右手摩觸其頂。既摩頂已。善財卽得一切佛刹微塵數三昧門。各以一切佛刹微塵數三昧而爲眷屬。一一三昧悉見昔所未見一切佛刹微塵數佛大海。集一切佛刹微塵數一切智助道具生一切佛刹微塵數一切智上妙法。發一切佛刹微塵數一切智大誓願入一切佛刹

微塵數大願海。住一切佛刹微塵數一切智出要道。
修一切佛刹微塵數諸菩薩所修行。起一切佛刹微
塵數一切智大精進。得一切佛刹微塵數一切智淨
光明。如此娑婆世界毗盧遮那佛所普賢菩薩摩訶
財頂。如是十方所有世界及彼世界一一塵中一切
世界。一切佛所普賢菩薩悉亦如是。摩訶善財頂所得
法門亦皆同等。

〔疏〕於中三。初摩頂。次旣摩下得益。前向外觀。故得
智度。此摩頂親證。故得三昧。後如此娑婆下。結通
良以善財等普賢故。二摩頂得益竟。

○第三明因深廣因深則果厚故。文分爲三。初問答審見。二顯因深遠。三結因成果。今初

爾時普賢菩薩摩訶薩告善財言。善男子。汝見我此神通力不。唯然已見。大聖。此不思議大神通事。唯是如來之所能知。

○二顯因深遠

普賢告言。善男子。我於過去不可說不可說佛刹微塵數劫行菩薩行。求一切智。一一劫中。爲欲清淨菩提心故。承事不可說不可說佛刹微塵數佛。一一劫中。爲集一切智福德具故。設不可說不可說佛刹微

塵數廣大施會。一切世間咸使聞知。凡有所求悉令
滿足。一一劫中爲求一切智法故。以不可說不可說
佛刹微塵數財物布施。一一劫中爲求佛智故。以不
可說不可說佛刹微塵數城邑聚落國土王位妻子
眷屬眼耳鼻舌身肉手足乃至身命而爲布施。一一
劫中爲求一切智首故。以不可說不可說佛刹微塵
數頭而爲布施。一一劫中爲求一切智故。於不可說
不可說佛刹微塵數諸如來所。恭敬尊重承事供養。
衣服臥具飲食湯藥。一切所須悉皆奉施。於其法中
出家學道。修行佛法。護持正教。善男子。我於爾所劫

海中。自憶未曾於一念間不順佛教。於一念間生瞋
害心。我我所心。自他差別心。遠離菩提心。於生死中
起疲厭心。懶惰心。障礙心。迷惑心。唯住無上不可沮
壞。集一切智助道之法。大菩提心。善男子。我莊嚴佛
土。以大悲心救護衆生。教化成就。供養諸佛。事善知
識。爲求正法。弘宣護持。一切內外悉皆能捨。乃至身
命亦無所吝。一切劫海說其因緣。劫海可盡。此無有
盡。善男子。我法海中。無有一文。無有一句。非是捨施
轉輪王位而求得者。非是捨施一切所有而求得者。
善男子。我所求法。皆爲救護一切衆生。一心思惟。願

諸衆生得聞是法。願以智光普照世間。願爲開示出世間智。願令衆生悉得安樂。願普稱讚一切諸佛。所有功德。我如是等往昔因緣。於不可說不可說佛刹微塵數劫海。說不可盡。

〔疏〕文中三。一別明求菩提行於中。二先順顯所行。後善男子我於下。結離過成德。二我莊嚴下。通明悲智行。三我法海中下。別明求法行於中。先反顯無不能捨。一文尙無所不捨。况全部耶。以一文卽一切之一。如海一滴故。後我所求法下。顯求所爲。結說無盡。

○第三結因成果

是故善男子。我以如是助道法力。諸善根力。大志樂力。修功德力。如實思惟一切法力。智慧眼力。佛威神力。大慈悲力。淨神通力。善知識力。故得此究竟三世平等清淨法身。復得清淨無上色身。超諸世間。隨諸衆生心之所樂而爲現形。入一切刹。徧一切處。於諸世界廣現神通。令其見者靡不欣樂。

〔疏〕於中先結因。以有成果之功。故云力也。文有十句。初四緣因。次二了因。後四通於緣了。後得此下成果。謂由了因。故得法身果。由緣因。故得色身果。

三。明因深廣竟

○第四觀用無涯。於中三。初舉益勸觀。次觀見奇特。後拔量顯勝。今初

善男子。汝且觀我如是色身。我此色身。無邊劫海之所成就。無量千億那由他劫。難見難聞。善男子。若有衆生。未種善根。及種少善根。聲聞菩薩。猶尚不得聞我名字。況見我身。善男子。若有衆生。得聞我名。於阿耨多羅三藐三菩提。不復退轉。若見若觸。若迎若送。若暫隨逐。乃至夢中。見聞我者。皆亦如是。或有衆生。一日一夜。憶念於我。卽得成熟。或七日七夜。半月一

月。半年一年。百年千年。一劫百劫。乃至不可說不可說。佛刹微塵數劫。憶念於我而成熟者。或一生。或百生。乃至不可說不可說。佛刹微塵數生。憶念於我而成熟者。或見我放大光明。或見我震動佛刹。或生怖畏。或生歡喜。皆得成熟。善男子。我以如是等佛刹微塵數方便。門令諸衆生於阿耨多羅三藐三菩提得不退轉。善男子。若有衆生見聞於我清淨刹者。必得生此清淨刹中。若有衆生見聞於我清淨身者。必得生我清淨身中。善男子。汝應觀我此清淨身。

疏有標釋結。初標可知。二我此下。釋中。二。二明難

見聞。二若有衆生下。明見聞皆益於中。三初明不退菩提益。次或有衆生下。善根成熟益。後我以如是下。總結多門。皆不退成熟於中。先多門皆不退。後若有衆生見聞下。種種皆成熟。淨利可生。身云何生。此有二義。一約法性身利。則與利爲體。名清淨利。與身爲體。名清淨身。從能依有殊。欲顯所依體一。故言生身。二約相用。淨利是所依之利。淨身則身內之利。欲顯身土互融。故言生淨身耳。後汝應觀下。總結。

○第二觀見奇特

爾時善財童子觀普賢菩薩身。相好肢節。一一毛孔中。皆有不可說不可說佛刹海。一一刹海皆有諸佛出興于世。大菩薩衆所共圍繞。又復見彼一切刹海。種種建立。種種形狀。種種莊嚴。種種大山。周而圍繞。種種色雲。彌覆虛空。種種佛興。演種種法。如是等事。各各不同。又見普賢於一一世界海中。出一切佛刹。微塵數佛化身雲。周徧十方一切世界。教化衆生。令向阿耨多羅三藐三菩提。時善財童子又見自身在普賢身內。十方一切諸世界中。教化衆生。

〔疏〕於中三。初見毛內含三世間。次又見普賢下。見

普賢身徧諸刹中。出生大用。後時善財童子下。自見已身等普賢化。

○第三校量顯勝

又善財童子。親近佛刹微塵數諸善知識。所得善根。智慧光明。比見普賢菩薩所得善根。百分不及一。千分不及一。百千分不及一。百千億分。乃至筭數譬喻。亦不能及。是善財童子從初發心。乃至得見普賢菩薩。於其中間所入一切諸佛刹海。今於普賢一毛孔中。一念所入諸佛刹海。過前不可說不可說佛刹微塵數倍。如一毛孔。一切毛孔悉亦如是。善財童子於

普賢菩薩毛孔剎中行一步。過不可說不可說佛剎
微塵數世界。如是而行。盡未來劫。猶不能知一毛孔
中剎海次第。剎海藏。剎海差別。剎海普入。剎海成。剎
海壞。剎海莊嚴。所有邊際。亦不能知佛海次第。佛海
藏。佛海差別。佛海普入。佛海生。佛海滅。所有邊際。亦
不能知菩薩衆海次第。菩薩衆海藏。菩薩衆海差別。
菩薩衆海普入。菩薩衆海集。菩薩衆海散。所有邊際。
亦不能知入衆生界。知衆生根。教化調伏諸衆生智。
菩薩所住甚深自在。菩薩所入諸地諸道。如是等海
所有邊際。善財童子於普賢菩薩毛孔剎中。或於一

刹經於一劫如是而行。乃至或有經不可說不可說。佛刹微塵數劫如是而行。亦不於此刹沒。於彼刹現。念念周徧無邊刹海。教化衆生。令向阿耨多羅三藐三菩提。

〔疏〕於中三。初。校量善根。二。從初發心下。校量所入刹海。三。善財童子於普賢下。雙顯上二超勝之相。於中二。先別明橫豎深廣。於中有三世間。一。器世間。一步超過。顯橫廣。盡未來劫。明豎窮。猶不能知。顯深遠。藏約包含。普入。約廣徧。餘可知。後善財童子於下。總結平等周徧。不於此沒彼現者。以沒現。

相如法性故。以此彼相相卽故也。鈔以沒現相者斯則沒而無沒
現而無現。眞法性中。無出沒故。此約事理無礙下
句云。以此彼相相卽故者。卽事事無礙法界。然相
卽有三。一約利。此利卽彼利。一利卽多利故。二約
人。此身卽彼身。一步卽多步故。三約劫。一念卽是
無量劫故。又此彼相。炳然具故。秘密隱顯。俱時成
故。此彼時處。互相在故。帝網重重。同時具足。皆不
動。故。四觀用無涯竟。

○第二明位滿齊佛

當是之時。善財童子則次第得普賢菩薩諸行願海。
與普賢等。與諸佛等。一身充滿一切世界。刹等。行等。
正覺等。神通等。法輪等。辯才等。言辭等。音聲等。力無
畏等。佛所住等。大慈悲等。不可思議解脫自在悉皆

同等

〔疏〕於中初句明自得。餘皆等上。初一等因圓。次一等果滿。一身下。別顯等相。此卽義當等覺。因位旣滿。更無所修。故但說等。不辨更求。此則一生頓成。行布亦足。非唯但約理觀。初後圓融。

已上第一正明見聞證人竟

〔論〕爾時善財童子依彌勒菩薩摩訶薩教已下。至頌。此一段明善財已於慈氏所得一生之佛果。普印一百一十城之法門。方於初信心中金剛藏智菩提場毘盧遮那如來師子座前一切寶蓮華藏。

座上起等虛空界廣大十種心等。以明經歷一百一十城。至慈氏。一生佛果。究竟不離初心毘盧遮那如來金剛藏智菩提妙理中成。便於金剛藏智菩提妙理之中。起法界佛果。恆常普賢圓周法界妙行。以此已下善財於普賢身中行菩薩行。普賢摩善財童子頂。方明法界中恆常佛果。恆常普賢行相及相應。方始得一切諸佛已成舊果。普賢舊行。至慈氏菩薩。明此無三世中一生。是見修行。初始入佛果位之生。當來降神下生。是當來成佛之生。以六相法門該之。善財亦以今生是見道。

修行行滿之生。來生方明成佛之生。以此當來一
生之佛果。會根本金剛藏智菩提妙理。毘盧遮那
如來所得之果。普賢舊行。本來一體具足。三世古
今不二。時復不遷。同異自在。處法界因陀羅網無
礙法門。從此慈氏一位法門。約分六門。一。明舉果
成因起信門。二。明已信加行契修門。三。加行修行
契果門。四。已將所契之果會因門。五。還依本因圓
融門。六。究竟法界始終因果無二同時不遷門。以
此六門和會。可見其意。此一段有十紙。已下經。明
善財於慈氏菩薩所。勝進入一生之佛果智境。得

三世一切境界。不念莊嚴藏門。返印一百一十城之法門。入初信心時。不出刹那際。因圓果滿。至金剛藏菩提場。毘盧遮那如來師子座前。一切寶蓮華藏座上。起等虛空界廣大十種心。方起恆常法界佛果普賢行。以此位中。十方佛刹微塵中。普賢菩薩。一一塵中。一時摩善財頂。以明佛果法界行滿。意明。行滿不離因。時不遷。智不異。乃至見佛刹微塵數善知識。乃至見普賢身肢節毛孔中國土身。以明入法界智境行網。一多重重。無礙無礙。無盡無盡。利生常然之門。具如文自廣明。

○第二明聞佛勝德難思。前長行但顯因圓。此偈方陳果用。非頌前文。然有二意。一對普賢。普賢意云。上見我難思。尙是因位。今示汝果。尤更甚。淡。二對善財。善財等佛。但是因圓。以果海離言。故不說成佛。今寄現佛之德。以顯善財果相。故長行偈文。因果綺互。文中三。初偈頌標德。誠聽許說。鈔故長行者。長行顯普賢因。偈顯善財果。故云綺互故。爾時普賢菩薩摩訶薩。卽說頌言。

汝等應除諸惑垢

一心不亂而諦聽

我說如來具諸度

一切解脫真實道

出世調柔勝丈夫

其心清淨如虛空

恒放智日大光明

普使羣生滅癡闇

如來難可得見聞

無量億劫今乃值

如優曇華時一現

是故應聽佛功德

隨順世間諸所作

譬如幻士現衆業

但爲悅可衆生心

未曾分別起想念

○二長行舉衆渴仰欲聞

爾時諸菩薩聞此說已。一心渴仰。唯願得聞如來世
尊真實功德。咸作是念。普賢菩薩。具修諸行體性清
淨。所有言說皆悉不虛。一切如來共所稱歎。作是念

已。深。生。渴。仰。

○三廣陳德相。令衆求滿。於中二。先長行。重誠許
說分齊。後偈頌。廣顯佛德難思。

爾時普賢菩薩。功德智慧具足莊嚴。猶如蓮華。不著
三界一切塵垢。告諸菩薩言。汝等諦聽。我今欲說佛
功德海一滴之相。卽說頌言。

佛智廣大同虛空

普徧一切衆生心

悉了世間諸妄想

不起種種異分別

一念悉知三世法

亦了一切衆生根

譬如善巧大幻師

念念示現無邊事

疏九十五偈分二。先九十三偈別歎佛德。後二偈結德無盡。勸信勿疑。前中前八十偈法說。後十三偈喻明。然通讚毘盧遮那十身圓滿二十一種殊勝功德。卽分二十一一段。初有二偈。卽於所知一向無障轉功德。謂佛無障礙智於一切事品類差別無著無礙故。鈔然通讚者。通有兩重。一者近通。通盡二偈經文。良以二偈亦是最後無盡德故。其二十一德。一經數節出其名義。文有隱顯。欲彰如來無盡德故。大體無異。故復出之。升兜率品已廣分別。今皆畧指。初有二偈者。然此二偈含於總句。妙悟皆滿。妙悟卽是妙覺智故。以無著論不釋總句。疏畧不明。若欲明者。初偈當之。今但顯別。卽當第一。然準上文二十一德。皆有三節。一舉經名。如此德。經卽二行永絕。二無著菩薩立功德名。卽今疏

云。於所知一向無障轉功德。二引二論解其本論。即今疏云。佛無礙智下文是也。是無性意。即是智德。故經偈云。佛智廣大。初之二句。即是德體。三及後偈。即於所知無障轉也。謂即於其極遠時處。品類皆知。故無有知及與不知之二相也。第四句了俗由於證真。故不起分別。亦是真。實離智障也。若親光釋不二現行云。謂凡夫二乘。現行二障。世尊無故。謂凡夫現行生起諸雜染。二乘現行涅槃。染後偈。唯證涅槃。廣大利樂。

隨衆生心種種行

往昔諸業誓願力

令其所見各不同

而佛本來無動念

疏二有一偈。明於有無無二相。真如最清淨。能入

功德。謂了真如無二。故無動念。鈔二有一偈者。約

中先引無著立名。後謂了真如下。即無性釋意。故無動念。是疏以經帖然無性名此爲無任涅槃。既

自入真如。故不住生處。亦令他人。故不住涅槃。
今經三句。卽不住涅槃。第四句是不住生處。

或有處處見佛坐 充滿十方諸世界

或有其心不清淨 無量劫中不見佛

或有信解離憍慢 發意卽得見如來

或有諂誑不淨心 億劫尋求莫值遇

或一切處聞佛音 其音美妙令心悅

或有百千萬億劫 心不淨故不聞者

疏三有三偈。卽無功用佛事不休息功德。謂任佛

無任處作佛事不休息。故云或見等。鈔三有三偈

於佛住。疏中先依無著立功德名。後謂任佛下。卽
無性釋無性生起云。爲欲得上無任涅槃。故次明

之。卽是恩德。謂佛雖徧聖天梵住。而空大悲徧善安住。由住空故。不住生處。由住悲故。不住涅槃。一切時中。觀所調伏。故隨物欲。或見不同。

或見清淨大菩薩

充滿三千大千界

皆已具足普賢行

如來於中儼然坐

或見此界妙無比

佛無量劫所嚴淨

毗盧遮那最勝尊

於中覺悟成菩提

或見蓮華勝妙刹

賢首如來住在中

無量菩薩衆圍繞

皆悉勤修普賢行

或有見佛無量壽

觀自在等所圍繞

悉已住於灌頂地

充滿十方諸世界

或有見此三千界

種種莊嚴如妙喜

阿閼如來住在中

及如香象諸菩薩

或見月覺大名稱

與金剛幢菩薩等

住如圓鏡妙莊嚴

普徧十方清淨刹

或見日藏世所尊

住善光明清淨土

及與灌頂諸菩薩

充徧十方而說法

或見金剛大燄佛

而與智幢菩薩俱

周行一切廣大刹

說法除滅衆生翳

一一毛端不可說

諸佛具相三十二

菩薩眷屬共圍繞

種種說法度衆生

或有觀見一毛孔

具足莊嚴廣大刹

無量如來悉在中

清淨佛子皆充滿

或有見一微塵內

具有恒沙佛國土

無量菩薩悉充滿

不可說劫修諸行

或有見一毛端處

無量塵沙諸刹海

種種業起各差別

毗盧遮那轉法輪

或見世界不清淨

或見清淨寶所成

如來住壽無量時

乃至涅槃諸所現

普徧十方諸世界

種種示現不思議

隨諸衆生心智業

靡不化度令清淨

如是無上大導師

充滿十方諸國土

示現種種神通力

我說少分汝當聽

疏四有十五偈。即於法身中所依意樂作事無差別功德。謂由諸佛所依智同。益生意樂同。報化作用同。故前經云。得佛平等。亦同攝論四種意趣中平等意趣。故此廣列諸佛。皆互相徧。此釋已妙。

有十五偈下。約經。即得佛平等。疏中分四。一。依無著立功德名。二。謂由諸佛下。即彼論釋。諸佛有三事平等。即疏所引。三。同是也。三。故前經云下。指經。即離世間品初也。以彼具足二十一種功德名。故四亦同下。引他論會釋。結云。此釋已妙者。古來諸德不知此。即二十一德。亦不知此。是佛平等。但云如來。隨機隱顯。忽列諸佛。莫知其由。今云顯。佛平等。故廣列諸佛。皆相徧耳。豈非妙耶。今更

以文理證此諸佛皆遮那之身。今更下。卽就佛平等中。顯實是本師

更過平等之意趣耳。謂此文言此三千界阿閼在中。阿閼本在東方。今云在此。明不異此。又無量壽佛。月覺如來。皆徧十方。豈容隔此。又皆言或見。則知一佛。隨見不同。謂此文言下。二引此經文。質成正義。自有三意。一東方之佛。云在此者。明阿閼卽是本師。二阿彌陀充滿十方。亦合徧此。同於本方。卽釋迦矣。三通取或見。明是本師。或有見爲阿閼彌陀諸佛。異耳。若言別讚餘佛。直言阿閼在此。何成讚德。若言別下。二遮救中。恐外救云。今明阿閼彌陀徧等。自是別讚彌陀阿閼。何得引是本師佛耶。故今遮云。若如此者。普賢本讚本師釋迦如來。况華藏今云東西諸佛徧此。何成讚我本師耶。况華藏刹海。皆遮那化境。無量壽等。未出刹種之中。豈非

是此佛耶。華藏下。四引前經文。成屬本師。娑婆當
塵數世界圍繞。無量壽佛國。但言從此西方過十
萬億佛土。尚未能滿一合之塵。况於一利塵數。况
十三佛利塵數。其十三重內。皆是化境。况華藏世
界利海。有十不可說佛利微塵數世界種。一一種
中。有不可說佛利微塵數世界。皆是本師之所嚴
淨。其中。皆是遮那如來分身化行。安養近在十三
重之內。何得非是本師釋。法華央掘。竝說十方分
迦。故云。豈非是此佛耶。法華下。五引他經成立中。二經分身。已如前引。
身。法華下。五引他經成立中。二經分身。已如前引。
佛等。近。故知法藏別緣。十六王子。皆方便說。故知
而非耶。故知法藏別緣。十六王子。皆方便說。故知
下。六遮其引難。為決他經。一引清淨平等覺經說
法藏比丘。然大寶積第十七。無量壽如來會說名
法處比丘。佛在耆闍崛山說。阿難起問。白佛言。大
德世尊。身色諸根。悉皆清淨。威光赫奕。如融金聚
又。如明鏡。凝照光輝。從昔以來。初未曾見喜得瞻
仰。生稀有心。世尊。今者入大寂定。行如來行。皆悉

圓滿善能建立大丈夫行。思惟現在去來諸佛世尊。何故住斯念耶。佛讚聖知。便為說往昔過無邊阿僧祇無數大劫。有佛出現。號曰然燈。此前展轉復舉諸佛。最後乃云。世主佛前無邊數劫。有佛出世。號世間自在王。彼佛法中。有一比丘名曰法處。有殊勝願。詣如來所。以偈讚佛。既讚佛已。佛為說二十。一億清淨佛土。具足莊嚴。彼比丘悉皆攝授。攝已。滿足五劫。思惟修習。便向彼佛發四十八願。發願已。後更經多劫修行。成就功德。乃至成佛。後阿難問。此法處比丘。成佛為過去耶。未來耶。為今現在。佛告阿難。西方去此十萬億佛刹。彼有世界名曰極樂。法處比丘。在彼成佛。號無量壽。今現在說法。然後廣說其土莊嚴。釋曰。既如來說他昔因。今果。何得判為即本師耶。二引法華經十六王子。即第三大通智勝佛云。彼佛弟子。十六沙彌。今皆得阿耨多羅三藐三菩提。於十方國土。現在說法。有無量百千萬億菩薩聲聞。以為眷屬。其二沙彌。東方作佛。一名阿閼在歡喜國。二名須彌頂。東南方二佛。一名師子音。二名師子相。南方二佛。一名虛空住。二名常滅。西南方二佛。一名帝相。二名梵

相。西方二佛。一名阿彌陀。二名度一切世間苦惱。西北方二佛。一名多摩羅跋梅檀香。二名須彌相。北方二佛。一名雲自在。二名雲自在王。東方佛名壞一切世間怖畏。第十六我釋迦牟尼佛。於娑婆國上。成阿耨多羅三藐三菩提。釋曰。既第一佛名曰阿閼第九王子。卽爲彌陀。十六釋迦本因。旣殊。得佛。又別云。何渾亂言。皆本師故。疏釋云。皆是方便。復應問言。豈法華經判爲方便。今當還引法華答之。法華壽量品云。於是中間。我說然燈佛等。又復言。其入於涅槃。如是皆以方便分別。則等言。已等十六王子。復應問言。然燈去今。方一僧祇。可爲方便。自在王佛。大通智勝。已經無量無邊不可思議阿僧祇劫。豈爲方便。故應答言。云大通雖已久矣。比之壽量劫數不多。謂說大通。但磨三千大千地種。以爲其墨。過於東方千國土。卽下一點。以爲校量。彼佛滅度。但過是數無量無邊百千阿僧祇劫。豈同壽量說成佛遠。經云。譬如五百萬億那由他阿僧祇三千大千世界。假使有人。末爲微塵。那過於東方五百千萬億那由他阿僧祇。若著微塵。及不塵。如是東方。盡是微塵。是諸世界。若著微塵。及不

著者。盡以爲塵。一塵一劫。我成佛以來。復過於此。百千萬億那由他阿僧祇劫。釋曰。以此之驗。方之大通三千墨點。非可類矣。自此劫來。皆是方便。故然燈等言。無不該也。是以昔人云。十六王子。尙掩成道之初。斯言愜當。則知彌陀阿闍佛等。皆是本師成佛後事。義無惑矣。自在王佛。展轉多劫。但以數明劫。豈如以理推之。皆是如來海印所現。何緣末塵爲劫耶。不說自所現佛而說他耶。故知賢首佛等。皆本師矣。以理推下。第七結成正義。十方諸佛。皆我本師。海印頓現。且法華分身。有多淨土。如來何不指已淨土。而令別往彌陀。妙喜思之。故知賢首彌陀等佛。皆本師矣。復何怪哉。言賢首者。卽壽量品中。過百萬阿僧祇利。最後勝蓮華世界之如來也。經中偈云。或見蓮華勝妙利。賢首如來任其中。若此不是歎本師者。說他如來。在他國土爲何用耶。且如總持教中。亦說三十七尊。皆是遮那一佛所現。謂毘盧遮那如來。謂大圓鏡智。流出東方阿闍如來。智流四方如來。謂大圓鏡智。流出東方阿闍如來。

平等性智。流出南方寶生如來。妙觀察智。流出西方無量壽如來。成所作智。流出北方不空成就如來。法界清淨智。卽自當毘盧遮那如來。言三十七者。五方如來。各有四大菩薩。在於左右。復成二十。謂中方毘盧遮那如來四大菩薩者。一金剛波羅密菩薩。二寶波羅密菩薩。三法波羅密菩薩。四羯磨波羅密菩薩。東方阿閼如來四菩薩者。一金剛薩埵菩薩。二金剛王菩薩。三金剛愛菩薩。四金剛善哉菩薩。南方寶生如來四菩薩者。一金剛寶。二金剛威光。三金剛幢。四金剛笑。西方無量壽如來。亦名觀自在王如來。四菩薩者。一金剛法。二金剛利。三金剛因。四金剛語。北方不空成就如來四菩薩者。一金剛葉。二金剛法。三金剛藥叉。四金剛拳。已上總有二十五也。及四攝八供養。故三十七言。四攝者。卽鉤索鎖鈴。八供養者。卽香華燈塗。戲鬘歌舞。皆上有金剛。下有菩薩。然此三十七尊。各有種子。皆是本師智用流出。與今經中海印頓現。大意同也。問。若依此義。豈不違於平等意趣。平等意趣云。言卽我者。依於平等意趣。而說非卽我身。如何皆說爲本師耶。答。平等之言。乃是一義。唯識尙

說一切衆生中有屬多佛。多佛共化以爲一佛。若屬一佛。一佛能示現以爲多身。十方如來。一皆爾。今正一佛能爲多身。然此段文亦兼顯第十七依此而讚。方讚本師。

隨其勝解。示現差別佛土功德。然此段下第八辨其兼含。此含第十

七德。故至下文。說相則少。所以此中兼此德者。有二意故。一爲類例義相似故。不欲繁文。故現妙喜極樂等土。二者以第十七成於此段。全是今師由差別土。皆是本師一佛現故。不見此意。豈知經旨勿輕爾也。文中三。初八主伴嚴土攝生同。次四微細含容轉法同。後三總攝多門。結前生後。

或見釋迦成佛道 已經不可思議劫

或見今始爲菩薩 十方利益諸衆生

或有見此釋師子 供養諸佛修行道

或見人中最勝尊

現種種力神通事

或見布施或持戒

或忍或進或諸禪

般若方便願力智

隨衆生心皆示現

〔疏〕五或見釋迦下三偈。卽修一切障對治功德。謂

一切時常修覺慧。治六蔽等故。旣云已經多劫。則

不定始成。鈔五或見下。約經。卽到無障礙處。疏中

釋論意。以會經文。彼論具云。謂已慣習一切煩惱

及所知障。對治聖道。卽一切智。及定自性。以爲能

治。故無著論名爲修治。又以到於永離一切障處。

故經名爲到無障處。經中別說。但明十度。而偈總

云。供養諸佛修行道。則無所不具。疏有等言。旣云

已經者。卽此段初半偈。經云。或見釋迦成佛道。已

經不可思議劫。所以疏中牒此言者。遮天台師之

謬釋也。謂彼學者多云。華嚴雖則玄妙。而有二事

不如法華。一兼別義。是故不說聲聞作佛。二說如來始成正覺。不說本師壽量久成。故疏中指此經文。卽是此經說久成處。若以此後不得該前。則法華壽量不能該於我始坐道場於三七日思惟等迹。然彼師以久成爲本。始成爲迹。今經之本則非古非今。若就迹門。則能今能久。生公亦云。是以極設長壽。言伽耶是一。若伽耶是者。非復伽耶。伽耶旣非。彼長安獨是乎。長短斯非。則所以長短存焉。誠爲妙悟。不說聲聞得作佛者。約不共義。旣不厭捨。曾何棄之。况一成一。無一衆生不具佛智。善須得意。勿雜釋經。

或見究竟波羅蜜

或見安住於諸地

總持三昧神通智

如是悉現無不盡

或現修行無量劫

住於菩薩堪忍位

或現住於不退地

或現法水灌其頂

或現梵釋護世身

或現刹利婆羅門

種種色相所莊嚴

猶如幻師現眾像

〔疏〕六有三偈。卽降伏一切外道功德。於中初二卽

教證二道。後一現所摧同類之身。鈔六有三偈下。卽經不可轉法。

言初二卽教證二道者。一偈之中。各合教證。初句證道。次諸地句。含於教證。次半偈。唯教。後偈之中。堪忍不退。皆是證道。餘卽教道。

或現兜率始降神

或見宮中受嬪御

或見棄捨諸榮樂

出家離俗行學道

或見始生或見滅

或見出家學異行

或見坐於菩提樹

降伏魔軍成正覺

或有見佛始涅槃

或見起塔徧世間

或見塔中立佛像

以知時故如是現

或見如來無量壽

與諸菩薩授尊記

而成無上大導師

次補住於安樂刹

或見無量億千劫

作佛事已入涅槃

或見今始成菩提

或見正修諸妙行

或見如來清淨月

在於梵世及魔宮

自在天宮化樂宮

示現種種諸神變

或見在於兜率宮

無量諸天共圍繞

爲彼說法令歡喜

悉共發心供養佛

或見住在夜摩天

忉利護世龍神處

如是一切諸宮殿

莫不於中現其像

於彼然燈世尊所

散華布髮爲供養

從是了知深妙法

恆以此道化羣生

或有見佛久涅槃

或見初始成菩提

或見住於無量劫

或見須臾卽滅度

身相光明與壽命

智慧菩提及涅槃

衆會所化威儀聲

如是一一皆無數

或現其身極廣大

譬如須彌大寶山

或見加趺不動搖

充滿無邊諸世界

或見圓光一尋量

或見千萬億由旬

或見照於無量土

或見充滿一切剎

或見佛壽八十年

或壽百千萬億歲

或住不可思議劫

如是展轉倍過此

佛智通達淨無礙

一念普知三世法

皆從心識因緣起

生滅無常無自性

於一剎中成正覺

一切剎處悉亦成

一切入一一亦爾

隨衆生心皆示現

〔疏〕七或現兜率下十六偈。卽生在世間不爲世法所礙功德。於中初五。八相現世無礙。次三處天宮

殿無礙。次六隨世巧化無礙。後二結無礙智之能
徧隨機。鈔七或現下約經卽所行無礙

如來住於無上道

成就十力四無畏

具足智慧無所礙

轉於十二行法輪

了知苦集及滅道

分別十二因緣法

法義樂說辭無礙

以是四辯廣開演

諸法無我無有相

業性不起亦無失

一切遠離如虛空

佛以方便而分別

如來如是轉法輪

普震十方諸國土

宮殿山河悉搖動

不使衆生有驚怖

如來普演廣大音

隨其根欲皆令解

悉使發心除惑垢

而佛未始生心念

或聞施戒忍精進

禪定般若方便智

或聞慈悲及喜捨

種種言辭各差別

或聞四念四正勤

神足根力及覺道

諸念神通止觀等

無量方便諸法門

龍神八部人非人

梵釋護世諸天衆

佛以一音爲說法

隨其品類皆令解

若有貪欲瞋恚癡

忿覆慳嫉及憍諂

八萬四千煩惱異

皆令聞說彼治法

若未具修白淨法

令其聞說十戒行

已能布施調伏人

令聞寂滅涅槃音

若人志劣無慈愍

厭惡生死自求離

令其聞說三脫門

使得出苦涅槃樂

若有自性少諸欲

厭背三有求寂靜

令其聞說諸緣起

依獨覺乘而出離

若有清淨廣大心

具足施戒諸功德

親近如來具慈愍

令其聞說大乘音

或有國土聞一乘

或二或三或四五

如是乃至無有量

悉是如來方便力

涅槃寂靜未曾異

智行勝劣有差別

譬如虛空體性一

鳥飛遠近各不同

佛體音聲亦如是

普徧一切虛空界

隨諸衆生心智殊

所聞所見各差別

佛以過去修諸行

能隨所樂演妙音

無心計念此與彼

我爲誰說誰不說

如來面門放大光

具足八萬四千數

所說法門亦如是

普照世界除煩惱

疏八如來住下。有十八偈。明安立正法功德。於中

初四偈立三乘法輪。兼顯業用。次三偈立六度道。

品對治法。次七明一音隨類。聞法不同。乃至無量。
後四明平等語業而應一切。鈔八如來住下。即經立不思議。

具足清淨功德智 而常隨順三世間

譬如虛空無染著 為衆生故而出現

示有生老病死苦 亦示住壽處於世

雖順世間如是現 體性清淨同虛空

一切國土無有邊 衆生根欲亦無量

如來智眼皆明見 隨所應化示佛道

〔疏〕九具足下三偈。明授記功德。謂記別過未如現在。故云悉明見。鈔九具足下。即經替見三世。

究竟虛空十方界

所有人天大衆中

隨其形相各不同

佛現其身亦如是

若在沙門大衆會

剃除鬚髮服袈裟

執持衣鉢護諸根

令其歡喜息煩惱

若時親近婆羅門

卽爲示現羸瘦身

執杖持瓶恒潔淨

具足智慧巧談說

吐故納新自充飽

吸風飲露無異食

若坐若立不動搖

現斯苦行摧異道

〔疏〕

十有四偈。明示現受用變化身功德。

鈔十有四偈者約經

卽身恆充滿一切世間

或持彼戒爲世師

善達醫方等諸論

書數天文地衆相

及身体咎無不了

深入諸禪及解脫

三昧神通智慧行

言談諷詠共嬉戲

方便皆令住佛道

〔疏〕十一或持下二偈。明斷一切疑功德。謂於一切

境善決定故。能斷他疑。鈔十一等者。約經卽智恆明達一切諸法

或現上服以嚴身

首戴華冠蔭高蓋

四兵前後共圍繞

誓衆宣威伏小王

或爲聽訟斷獄官

善解世間諸法務

所有與奪皆明審

令其一切悉欣伏

或作大臣專弼輔

善用諸王治政法

十方利益皆周徧

一切衆生莫了知

或爲粟散諸小王

或作飛行轉輪帝

令諸王子采女衆

悉皆受化無能測

或作護世四天王

統領諸龍夜叉等

爲其衆會而說法

一切皆令大欣慶

或爲忉利大天王

住善法堂歡喜園

首戴華冠說妙法

諸天觀仰莫能測

或住夜摩兜率天

化樂自在魔王所

居處摩尼寶宮殿

說眞實行令調伏

或至梵天衆會中

說四無量諸禪道

普令歡喜便捨去

而莫知其往來相

或至阿迦尼吒天

爲說覺分諸寶華

及餘無量聖功德

然後捨去無知者

〔疏〕十二有九偈。令入種種行功德。謂徧了一切有

情性行。隨根令入故。鈔十二等者。約經了。一切行。

如來無礙智所見

其中一切諸衆生

悉以無邊方便門

種種教化令成就

〔疏〕十三如來無礙智一偈。卽當來生妙智功德。謂

佛知久遠故。疑鈔十三如來下。約經盡一切疑。十一是斷自疑。此斷他疑。

譬如幻師善幻術

現作種種諸幻事

佛化衆生亦如是

爲其示現種種身

譬如淨月在虛空

令世衆生見增減

一切河池現影像

所有星宿奪光色

如來智月出世間

亦以方便示增減

菩薩心水現其影

聲聞星宿無光色

譬如大海寶充滿

清淨無濁無有量

四洲所有諸衆生

一切於中現其像

佛身功德海亦爾

無垢無濁無邊際

乃至法界諸衆生

靡不於中現其影

疏十四有五偈。隨其勝解。示現功德。謂隨解現身。
故。鈔十四下。卽經無能測身。

譬如淨日放千光 不動本處照十方

佛日光明亦如是 無去無來除世闇

譬如龍王降大雨 不從身出及心出

而能霑洽悉周徧 滌除炎熱使清涼

如來法雨亦復然 不從於佛身心出

而能開悟一切衆 普使滅除三毒火

疏十五有三偈。卽無量所依調伏有情。加行功德。

意云。佛智為無量菩薩調伏衆生。加行之所依故。

如來清淨妙法身

一切三界無倫匹

以出世間言語道

其性非有非無故

雖無所依無不住

雖無不至而不去

如空中畫夢所見

當於佛體如是觀

〔疏〕十六二偈。明平等法身波羅密多成滿功德。然

同攝論。法身具五種相。初句白法為相。以是極果

圓滿自在故。次二句不思議相。次一是無二相。次

一無依相。次句常住相。次句二喻者。空畫喻無依。

夢喻非有無二相。餘不可喻。或畧不喻。鈔十六如

即到佛無二
究竟彼岸

三界有無一切法 不能與佛爲譬喻

譬如山林鳥獸等 無有依空而住者

〔疏〕十七有一偈。明隨勝解示現差別佛土功德。既

隨解而現。故不可喻。此偈亦總拂前喻。如山等必

不依空。有等必不能喻佛。鈔十七下。約經卽具足如來平等解脫

大海摩尼無量色 佛身差別亦復然

如來非色非非色 隨應而現無所住

〔疏〕十八一偈。明三種佛身方處無分限功德。鈔十下。

卽經證無中邊佛平等地

虛空真如及實際 涅槃法性寂滅等

唯有如是真實法 可以顯示於如來

〔疏〕十九一偈。攝三種功德。同法性等。卽窮生灰際。常現利樂一切有情功德。等虛空。卽無盡功德。等實際等。卽究竟功德。以如實際之際。窮未來際故。
鈔十九下。約經卽極於法界。等虛空。界。窮未來際。配三德名。疏文具之。

剎塵心念可數知 大海中水可飲盡

虛空可量風可繫 無能盡說佛功德

若有聞斯功德海 而生歡喜信解心

如所稱揚悉當獲 慎勿於此懷疑念

〔疏〕後二偈。結德無盡。亦是別顯無盡功德。雖是總

結。卽當別文於中前偈結德。後偈勸信。古德亦有將此二偈爲一部流通。已如前說。鈔上來且欲將結。故配三德。理實後二。正是等虛空界。窮未來際無盡功德。故疏云。亦是別顯無盡功德。

〔論〕從八行頌已下至經末。明普賢稱歎如來法界果德。利生廣大無量功德分。於說頌中。分爲三段。一初八行頌。明普賢菩薩救衆諦聽。欲自說佛功德分。二有六行經。明衆歡喜樂聞分。三以頌畧申如來功德少許之分。其意頌文自具。入法界品竟。

○大文第四謙讚廻向

法性深廣難思議

我已隨分畧開解

願斯功德同實際

普令含識證菩提

鈔上半謙讚。上句讚。下句謙。下半迴向。三處初句。迴向實際。後二迴向衆生。及迴向菩提。然迴向菩提。復有二意。一自成菩提。二令他成。令他成者。義同迴向衆生。菩薩發心。不期自爲。卽以向他爲自。益耳。故令含識同證菩提。賢首和尚發願偈云。誓願見聞修習此圓融無礙菩提法。乃至失命終不離。盡未來際願相應。以此善根等法性。普潤無盡衆生界。一念多劫修菩提。盡成無上佛菩提。

芝城信女謝門徐氏法名太琇偕男信官超宗敬刊

華嚴經入法界品疏論纂要第一百之十六卷伏願菩提根深人天福勝永無魔障之侵時集亨嘉之慶
康熙二十二年八月 日華藏室謹題

大方廣佛華嚴經疏論纂要卷第一百之十六